



UPA 2026/173

27/5-2026

Bo Martinsen

**Inuiaqatigiit nunatsinni tarnikkut peqqinnerulernissaannik siunertaqarluni periusissiamik UPA2027-mut Naalackersuisut suliaqaqqullugit peqquneqarnissaannik Inatsisartut aalajangiiffissaattut siunnersuut.**

**(Inatsisartunut ilaasortaq Nivi Rosing, Inuit Ataqaqatigiit)**

(Siullermeerineq)

Inatsisartunut ilaasortap Nivi Rosingip siunnersuutaanut qujanaq.

Siunnersuut manna inuiaqatigiinnitsinni imaannaangilluinnartumut, inunnullu tunngalluinnartumut tunngalluinnarpoq. Systeminut, periutsinut imaluunniit allaffissornikkut sulianut tunngassuteqaqngilaq. Inunnut tunngassuteqarpoq. Ilaqutariinnut aliasuuteqarlutik inuusunut tunngassuteqarpoq. Inuusuttunut nalornisunut tunngassuteqarpoq. Meeqqanut toqqissimannginneq, nakuuserneq imaluunniit naapertuilluannngitsuliorneq qanilluinnarlugit peroriartortunut tunngassuteqarpoq. Inoqarfinnilu innuttaasunut amerlavallaarujussuurtunut imminut toqunermik, annaasaqarnermik, anniaateqarnermillu misigisaqarsimasunut tunngassuteqarpoq.

Demokraatit isumaqarput, kiffaangissuseqarnissamut aamma inuunerinnissamut tarnikkut peqqissuseq tunngavioqataalluinnartoq. Kiffaangissuseqarneq pisinnaatitaaffiinnarnut tunngassuteqaqngilaq. Kiffaangissuteqarneq nammineq inuunerisamiissinnaanermut, neriuteqarnissamut, imminut aamma qaniginerpaasanut akisussaaffeqarnermut, inuunermilu atukkat kisimiilluni nammannissaannut oqimaappallaalersillugit ikiorneqarsinnaalluni ilisimaarinninnermut aamma tunngassuteqarpoq.

Tamanna pillugu ilungersunartoq siunnersuuteqartup qaqitaa isumaqatigaarput. Imminut toqussimasut amerlassusaat akuerineqarsinnaangitsumik sivisuallaamik taamak amerlatigitillugit, meeqqallu aamma inuusuttut amerlavallaat nakuuserneq, naapertuilluannngitsuliorfigineqarneq imaluunniit annertuumik atugarliorneq misigisimappassuk, suliniutit ataasiakkaat naammagiinnarsinnaangikkigut tamanna ersiutaavoq.

Annertuumik iliuuseqartoqareerpoq. Qamani suliaavoq pingaarutilik. Peqqinnissaqarfimmi, kommunini, atuarfinni, qimarnguvinnilu sulisut, peqatigiiffiillu namminneq kajumissutsiminnik sulisut ullut tamarluinnaasa annertuumik suliaqartarput. Tamanna akuersaarlugulu ataqqissavarput. Kisianni suliniuteqarneq suli naammangitsoq unneqqarilluta oqarsinnaasariaqarpugut.

Tamanna pillugu inuiaqatigiit tarnikkut peqqinnerulernissaannik siunertaqarluni ataatsimut periusissioinnissamik siunnersuut Demokraatit tapersorsorpaat. Periusissiali nutaap aamma ilisaataaginnanginnissaa uagutsinnut aalajangiisuulluinnarpoq. Pilersaarutit ajunngitsumik siunertallit siornatigut takoreerpagut. Periusissiaq tunngavilersugaassaaq, anguneqarsinnaassaaq, suliniutinullu

UPA 2026/173

J.nr 00.00.00/26FM-LABU-00173

Qupp. 1



pioreersunut atalluinnassalluni. Qamani pillugu suliamut, suliniutinullu pioreersunut allanut nukittorsaataassaaq, marloriaammillu sulinermik imaluunniit assingusunik systeminik nutaanik pilersitsissanngilaq. Isumalluutit inunnut allannguiffiusunut atorneqassaput.

Ilisimasat pigeriikkagut aallaavigalugit suliap sularineqarnissaa aamma pingaaruteqarpoq. Ajornartorsiutit sumi anginerunersut, iliuseqarnissamullu pisariaqartitsineq sumi pinarnerpaanersoq pillugu takutsitsisunik misissuinerit, nalunaarusiat, misilittakkallu pigineqareerput. Tamanna pillugu ilisimariikkatta misissornissaannut pisariaqanngitsunik nukippassuit atussanngilagut. Ilisimasat, iliuseqarninngornissaannut nukiit atussavagut.

Uani pingaartumik meeqqat Demokraatit ersarissarusuppaat. Ataatsimoorussamik kingunerlutsitsisunut ikiorsiineq suliaavoq pingaarutilimmik, siunissamullu ungasinnerusumut suliassaq. Massakkoqqissaaq iliuseqannginnissamut utoqqatsissutinngunngisaannasaaq. Meeraq ullumikkut toqqissisimanngitsumik inuusoq, aqagumut periusissiasamik utaqqisinnaanngilaq. Meeqqap pisariaqartitai pingaarnerpaatinneqassapput. Siusissumik paasisaqarneq, ulluunerani paaqqinnittarfiit nukittuut, meeqqat atuarfiat toqqissisimanartoq, ilaqutariinnut katsorsaaneq, qimarnguviit, ikiorneqaratarsinnaanerlu suliniummi qitiusut ilagissavai. Meeraq sumiginnarneqareersoq, inuiaqatigiinnit sumiginnarneqassanngilaq.

Tarnikkut peqqissuseq peqqinnissaqarfimmiinnaq pineq ajorpoq. Ilaqutariinni, atuarfimmi, suliffimmi, ataatsimoorfinni, kulturimi, pinngortitami, innuttaasullu aamma inuiaqatigiit akornanni tatiginnittussaannermi aamma pilersarpoq. Tamanna pillugu periusissiaq inuk tamakkerlugu isigisinnaallugu siammasissaaq, kisiannili ima tunngavilersorluagaatigissalluni ulluinnarni allannguisinnaassalluni.

Demokraatit isumaqarput tamanna ataasiakkaanut kiffaanngissuseqarnerusoq, immitsinnullu akisussaassuseqarnerusoq. Inuiaqatigiinni ikinnerusut anniaamminnik kisermassissasut, amerlanerusullu ikiortissarsiornissaminnut sapiissuseqassasut kissaatigaarput.

Taamatut oqaaseqarlunga Demokraatit inassutigaat, siunnersuut Ilaqutariinnermut Peqqissutsimullu Ataatsimiititaliami nangillugu kajumittumik oqaluuserineqassasoq.